

Komisija za zaštitu ljudskih prava i sloboda
Predstavničkog doma Parlamenta Federacije Bosne i Hercegovine

Bosna i Hercegovina
Federacija Bosne i Hercegovine
PARLAMENT FEDERACIJE
SARAJEVO B

Odbor za rad i socijalnu zaštitu
Predstavničkog doma Parlamenta Federacije Bosne i Hercegovine

Primljeno: 09-05-2022			
Broj. jed.	Broj	Priloga	Vrijednost
01	- 02 -	941	/22

PARLAMENT FEDERACIJE BOSNE I HERCEGOVINE

PREDSTAVNIČKI/ZASTUPNIČKI DOM


n/r g. Mirsad Zaimović, predsjedavajući

Na osnovu člana 179., a u vezi sa članom 163. Poslovnika Predstavničkog doma Parlamenta Federacije Bosne i Hercegovine („Službene novine Federacije BiH“, br. 69/07, 2/08 i 26/20) radi razmatranja i usvajanja po skraćenom postupku, podnosimo **PRIJEDLOG ZAKONA O IZMJENI I DOPUNI ZAKONA O ZDRAVSTVENOM OSIGURANJU FEDERACIJE BIH** („Službene novine Federacije BiH“, broj: 30/97, 7/02, 70/08, 48/11 i 36/18).

Predsjednica Odbora za rad i socijalnu zaštitu
Nasiha Pozder



Predsjednica Komisije za zaštitu ljudskih prava i sloboda
Miomirka Melank



**Komisija za zaštitu ljudskih prava i sloboda
Odbor za rad i socijalnu zaštitu**

PRIJEDLOG

**ZAKON
O IZMJENI I DOPUNI ZAKONA O ZDRAVSTVENOM
OSIGURANJU FEDERACIJE BOSNE I HERCEGOVINE –
SKRAĆENI POSTUPAK**

Sarajevo, maj 2022. godine

Obrazloženje prijedloga da se Prijedlog zakona razmatra i donese po skraćenom postupku

Budući da se radi o Zakonu koji nije složen i obiman, predlažemo da se Prijedlog Zakona razmatra i donese po skraćenom postupku u skladu sa članom 172. Poslovnika Predstavničkog doma Parlamenta Federacije Bosne i Hercegovine.

ZAKON O IZMJENI I DOPUNI ZAKONA O ZDRAVSTVENOM OSIGURANJU FEDERACIJE BIH

Član 1.

U Zakonu o zdravstvenom osiguranju FBiH („Službene novine Federacije BiH“, broj 30/97, 7/02, 70/08, 48/11 i 36/18) u članu 47, stav 2. dodaje se nova tačka 4., koja glasi:

„4. za vrijeme privremene spriječenosti roditelja koji je određen da njeguje dijete oboljelo od malignog oboljenja“.

Član 2.

U Zakonu o zdravstvenom osiguranju FBiH („Službene novine Federacije BiH“, broj 30/97, 7/02, 70/08, 48/11 i 36/18) u članu 57. stav (1) mijenja se i glasi:

Naknada plaće u vezi s korištenjem zdravstvene zaštite iz člana 42. tačka 3. do 5. i člana 47. stav 2. tačka 4. ovog zakona isplaćuje se osiguraniku na teret sredstava kantonalnog zavoda osiguranja od prvog dana korištenja prava.

Član 3.

Ovaj zakon stupa na snagu osmog dana od dana objavljivanja u Službenim novinama Federacije BiH.

I. – USTAVNI OSNOV

Ustavni osnov za donošenje ovog zakona sadržan je u članu III.2. tačka b), Ustava Federacije Bosne i Hercegovine, prema kojima je u zajedničkoj nadležnosti Federacije BiH i Kantona donošenje propisa o socijalnoj zaštiti, a Parlament Federacije BiH, uz ostala ovlaštenja predviđena Ustavom, odgovoran je za donošenje zakona kojima se reguliraju pitanja vezana za organizaciju zdravstva i zdravstvene zaštite u Federaciji Bosne i Hercegovine.

II. – RAZLOZI ZA DONOŠENJE ZAKONA

Trenutno je zakonskim rješenjem regulisano da pravo za naknadu plate u iznosu od 80% osnovice za naknadu, s tim da ne može biti niža od iznosa minimalne plate važeće za mjesec za koji se utvrđuje, imaju lica koja su određena da njeguju bolesnog supružnika ili dijete po uslovima propisanim zakonom. Smatramo da je iznos od 80% nedovoljan kada se radi o skrbi nad djecom oboljelom od raka, tj. od malignih oboljenja, te predlažemo da se ovaj procent dovede do maksimuma i izjednači sa statusom koje imaju osobe koje su vršile transplataciju ili osobe koje su spriječene za rad zbog profesionalne ozlijede kako je to definisano članom 47. Zakona.

S obzirom da nesretna bolest njihove djece onemogućava roditelje da budu radno aktivni, ključno je da država pruži maksimalnu pomoć onim roditeljima koji skrbe nad djecom oboljelom od raka. Najmanje što kao društvo možemo uraditi u takvim situacijama jeste da pomognemo roditeljima da se osjećaju finansijski stabilno, kako bi ih socioekonomski aspekt nemogućnosti rada što manje potresao u stresnim situacijama borbe za ozdravljenje njihove djece.

III. – OBRAZLOŽENJE PREDLOŽENIH MJERA

Član 1. - Ovim članom se dopunjuje stav 2. člana 47. važećeg Zakona koji utvrđuje naknade plate u iznosu od 100% za određene skupine.

Član 2. – Ovim članom definira se da se naknada plaće za lica iz člana 47. stav 2 isplaćuje na teret sredstava kantonalnog zavoda osiguranja.

Član 3. - Ovim članom se određuje stupanje na snagu ovog zakona.

IV. - PRINCIPI NA KOJIMA JE PRIJEDLOG ZAKONA ZASNOVAN

Ovaj prijedlog zakona je zasnovan na principima pravičnosti, transparentnosti, fiskalne održivosti, društvene odgovornosti i solidarnosti.

V. – POTREBNA FINANSIJSKA SREDSTVA ZA PROVOĐENJE ZAKONA

Za provođenje ovog zakona potrebno je osigurati dodatna sredstva u finansijskim planovima zavoda zdravstvenog osiguranja kantona/županija u Federaciji Bosne i Hercegovine u ukupnom procijenjenom iznosu od 150.000,00 KM.

Odredbe zakona koje se mijenjaju:

Član 47.

Naknada plaće određuje se u visini od najmanje 80% osnovice za naknadu s tim da ne može biti niža od iznosa minimalne plaće važeće za mjesec za koji se utvrđuje naknada.

Naknada plaće iznosi 100% od osnovice za naknadu:

1. za vrijeme privremene spriječenosti za rad zbog povrede na radu ili oboljenja od profesionalne bolesti,
2. za vrijeme privremene spriječenosti za rad zbog bolesti i komplikacija prouzrokovanih trudnoćom i porođajem,
3. za vrijeme privremene spriječenosti za rad zbog transplantacije živog tkiva i organa u korist druge osobe.

Visinu naknade plaće i najviši iznos naknade plaće koja se isplaćuje na teret kantonalnog zavoda osiguranja utvrđuje upravno vijeće kantonalnog zavoda osiguranja.

Član 57.

Naknada plaće u vezi s korištenjem zdravstvene zaštite iz člana 42. tač. 3. do 5. ovog zakona isplaćuje se osiguraniku na teret sredstava kantonalnog zavoda osiguranja od prvog dana korištenja prava.

Naknadu plaće iz stava 1. ovog člana obračunava i isplaćuje pravna odnosno fizička osoba, s tim da je kantonalni zavod osiguranja obavezan vratiti isplaćenu naknadu u roku od 45 dana od dana prijema zahtjeva za povrat.

Provedbene propise o načinu ostvarivanja prava na naknadu plaće iz stava 1. ovog članka donijet će upravno vijeće kantonalnog zavoda osiguranja.

OBRAZAC IZJAVA O FISKALNOJ PROCJENI

Obrazac IFP NE

A 1. Obrađivač propisa

	KOD	NAZIV
Razdjel		

B 2. Osnovni podaci o prijedlogu propisa

Vrsta propisa/akta	Zakon	DA	Odluka	NE	Strategija	NE
	Uredba	NE	Drugi akti	NE	Drugi akti planiranja	NE

Naziv propisa/akta Prijedlog zakona o izmjeni i dopuni Zakona o zdravstvenom osiguranju FBiH, predlagači Komisija za zaštitu ljudskih prava i sloboda i Odbor za rad i socijalnu zaštitu

C 3. Izjava o nepostojanju dodatnih fiskalnih efekata predloženog propisa

Dodatni fiskalni efekti ovog prijedloga neće opteretiti Budžet Federacije BiH i Finansijski plan Zavoda zdravstvenog osiguranja FBiH. Za provođenje ovog zakona potrebno je osigurati dodatna sredstva u finansijskim planovima zavoda zdravstvenog osiguranja kantona / županija u Federaciji BiH u ukupnom procijenjenom iznosu od 150.000,00KM godišnje. Iznos je baziran na trenutnom broju korisnika zdravstvenog osiguranja koji su određeni za njegu djeteta koje boluje od malignog oboljenja.

D 4. Pečat i potpis odgovornog lica obrađivača, odnosno predlagača propisa

Predsjednica Odbora za rad i socijalnu zaštitu, Nasiha Pozder
Predsjednica Komisije za zaštitu ljudskih prava i sloboda, Miomirka Melank

Mjesto i datum

Sarajevo, 9.5.2022.

